

古典文學 第三名 何維剛

個人簡介：臺灣大學中國文學系博士班二年級

何維剛，臺灣大學中文系博士班研究生，曾獲台北學獎、教育部文藝獎。研究領域為六朝文學，著有《六朝哀挽詩文研究》。

乙未詩鈔

八月赴陸寄重與諸詩友

慣聽瀛表噪蟬聲，仲夏江寧復遠行。願採蔣山青一片，天涯遙贈故人情。

數日燥溽久未作詩

囊滯哀情句，經旬未補裁。蔽天雲幕散，曬我腹書開。
煩鬱緣蟬噪，清幽欠雨催。烹茶頻檢韻，願得放心回。

文學院小園即目

由來僻性厭矜誇，寧向籬枝覓嫩芽。展翼崢嶸烏石木，倚風寥落紫荊花。
牆隅春滯抽新草，瓦上鶯歸賸晚霞。何賦小園唯庾信，青茵伴學始生涯。

端陽贈諸詩友

風雅追攀時愧心，喜從端節賦新吟。孤高自適元和體，玄雅誰談正始音。
釣句每須茶作餌，裁篇猶著酒為針。詩情常願如箕帚，掃盡靈臺歲月侵。

十月偶書，末聯用拗

詩心本欲待愁催，誰料愁來若死灰。篋笥殘篇纔脫手，人情舊債忽成堆。
癡唯筆墨真唯酒，山在襟懷月在杯。欲隱樊籠滅聞見，韜精留待解音開。

感懷

世味深嚐苦勝甘，人情徒合醉中參。焦頭始悟資愚魯，腆臉終歸付笑談。
歲月追逃無處可，親朋分聚有緣堪。襟懷自是千杯量，觸到心深酒易酣。

書懷兼贈重與諸詩友

寡合俗風時背馳，由來毀譽兩參差。冰心已慣居蝸舍，凡手何堪奪鳳池。
興半關卿春水句，情偏厚我竹枝詞。無多樂事能重與，莫使詩酬惱鬢絲。

購食泡芙懷前女友

重來滋味尚依然，卻引悲歡下舌邊。世道浮沉諸際遇，襟懷冷暖一雲煙。
恩情真處毋言悔，命分當時且惜緣。點滴酸甜唇齒在，而今舊夢異從前。

水調歌頭 懷人敬次愷容學姊韻

成敗恨經眼，老大悔雕蟲。斜陽隱處，年少青澀渺無蹤。欲訪憑欄舊夢，又恐人情聚散，疏影一簾風。松濤今已矣，歡笑幾時重。嘆約盟，分歧路，盡成空。奈緣未盡，天涯何日復相逢。縱是傷嗟回首，知可追之來者，坐聽孟真鐘。可憐多情鳥，隱沒晚霞中。

案：傅斯年字孟真。

多麗 櫟枯曹丕與吳質書

憶南皮，宴遊誠實難忘。設彈碁，終於六博，甘瓜浮水清涼。哀箏順，高談娛意，白日匿，繼以蟾光。觴酌流行，絲絃並奏，接輿連席興飛揚。曩時事、忽然經眼，樂極伏悲傷。驚回首、節同人異，世事無常。數年間、多離疾疫，一朝消逝蒼茫。姓名存，盡為鬼錄，懷舊識，輕轉愁腸。來者難誣，後生可畏，焉如吾輩縱輕狂。始知悟、昔遊不復，徒我慟思量。韶華過、攀援何可，淚灑瀟湘。

乙未仲夏史語所南京營記

江寧十日，望六朝勝跡，感慨殊深。秦淮風月，青樓絲肉，倩影風姿，不復可見。杜牧商女之歌，余懷板橋之記，天下綺艷，俱成絕響。今秦淮南北，商賈鱗次，霓燈璀璨，遊客如織。然金碧輝煌，唯感造作，人群囂擾，倍覺俗氣。古今變遷，地非故地，人慕烏衣巷名，誰知朱雀航事。閒遊漫步，入目盡俗，非雅癖者可久處。鍾阜蒼翠，聚千年之英華，劉備以為龍蟠虎踞，良有以也。子文逐賊、卞壺敗死，思將士之英烈。沈約應教、謝朓東田，慕名士之風姿。小姑之祠、蔣王之廟，盛極一時，今所莫見，人亦忘之。唯孝陵神道，孫權墓以戍守，中山長階，靈谷寺以旌忠。彰前朝功過，表國朝仁義，民心賴是以塑，國族借此歸正，今古之別又何異焉。千古之興衰，一代之感慨，皆繫此山。餘則丹陽帝陵，盡付荒草，臺城綿延，環抱玄武。棲霞飛天，懷南朝四百八十寺，石頭鬼臉，衛江左一千八百年。知燕雀曾經，塞於伯溫籌畫，懷江潮依舊，餘僅莫愁煙波。惜哉，山川如此，人何異哉。營期屆滿，適值七夕，人情變異，不過三年。瀛表佳人，今復何在，異域伶仃，感慨倍深。夢中相視，恍若昨日，纏綿軟語，轉眼雲煙。身寄江寧終是客，載酒少年，終亦往矣。是以記。